

GODAANNISA KALEEF...; SODAA ISA BORUU!

Miilla lamaan dhaabatani,
 bahanii galuu kana
Lubbuun jirtiidhaf qofa,
akkamiin jiraanne jenna?
Qe'ee dur dhabnee mitii,
kan guyyuu itti raajamnu
 Jireenyuu shakkii ta'ee,
lubbuufuu wabii hin qabnu!
 Har'a ni jirra jennee,
boruuf nagaan dhaammachaa
 Barii jiruu hanqannee,
wal waamna daboo boo'ichaa!
 Inni naga'aan oole,
 halkan naga'aa hin bulu
Kan lubbuun manaa bahe,
deebi'ee lubbuun hin galu!
 Tole jennees hin taane,
 lakki jennees dhibeera
 Akki nuti itti jirru,
akka isaan fedhan ta'eera!
Dubbiin horiif qabeenyaa,
 kan lafaallee bubbulee
Ilmaaf intala hin dhabnee,
 kenya maatiin ijoollee,

Haadha ijji imimmaanii,

garaan guyyuu raafamaa

Lubbu ilmaan isheetiif, gaafattee dhabdeerti gumaa!

Abbaattis baasni bahee, boquu cabee taa'ee gadda

Akka leenca hidhaa galee, ganamaa galgala aada!

‘Warri keenya bahanii

tasa karaatti hafanii’,

Guyyumaani kan dhageenyu,

aaga dheebote gurri

‘Nagaa oolle’ ‘nagaa bulleen’

erga dhibee lafti durii!

“Osoo tiksee qabaanee

tiksee gaarii qabaanee, ...sareen hin nyaattu hoolaa

Osoo maree qabaanee,

maree lammii qabaanee, ...roorroon nun baasu biyyaa!”

Jennee roorroo geararre

Roorroo baraan hin dabarre!

Akka hin lolannes roorroo kana,

foolleen keenyas bittinee

“Hoooo!”...jennee takkaa kaanee,

takkaammoo deebinee qorrinee,

Wareega kuma kanfallee,

karaa qixceedhaa deebina

Kufaatif caba lakkoofnee,

takka turreemmoo gaabbina!

Baruma darbaa dhufaa
Cinaan gamasii iyyee, cinaan gamasii rafaa
Tokkoof du'aa kaanif cidhaa, tokko ka'ee tokko kufaa
Harka namaatti gallee,
jiraannus jiruu hin qabnuu
Barumaan bartee godhannee,
maaliif kan lama dhabnuu??
Silaa karaadhaa hin deebinu,
hanga geenyutti lafa kaayyoo, ni deemna halkanii guyyaa
Barumaan boo'aa hafuurra,
Itti dhiignee galma geenyee, baranuma boo'uu wayyaa!
Silaa ani boo'ee ati hin sirbituu
Ani taa'ee ati hin kaatuu!
Karaa kee natti dhufa, karaakoo sittis dhufa
Ulaa nuti banneen, diinni nu gidduu gulufa!

Godaannisni kalees ragaadha,
Boruu keenyan sodaadha...!
Bakka rafneemmoo kaanee
wareegnee dhiigaaf lubbuu
Of duuba deebiin madaadha,
egeree fayyaa hin qabuu!
Osuma kaayyoof fiignuu
ceenee lafa walakkaa
Maqaa dibee arraba qaree,
namni keenya wal yakkaa!

Dubbii gola keessan quba funyaan wal keenyee
Gola bira dabarree yoom bakka yaadne geenyee?!...

Seenarraa waa dhaallee

Yoo tarkaanfanne malee,

Citaa mana keenyaa bitaa mirgaa luqqisaa

Gargar wal dhiibun kuni daranuu nu huqqisaa,

Akki keenya ka'anii taa'uu

yosuu ho'anii yosuu qabbanaa,

Bahanii karaa deebi'uun,

seenaafuu hin tolu itti gaabbinaa,

Cabaniis itti kufaniis,

fiixan baasudha malee

Tuttuqanii dhiisun kuni,

maqumaafuu hin tolle!

Godaannisa baay'ata qabsoon fiixa hin baane

Itti malatan malee dubbiin kun hin taane!

=====//=====

Nimoonaa K. Raggaasaa